

Inatsisartut suleriaasiat § 37 immikkoortoq 1 naapertorlugu matumuuna Naalakkersuisunut apeqqutit imaattut saqqummiuppakka:

**Napparsimasut Kangerlussuaq aqqusaarnerani tiimerpassuit utaqqisinnaasartut
ajornartorsiutigaat utaqqisarnermini innarfissaqaratillu
eqqissisimaarfissaqartannginnerat, immikkut iliuuseqarfigineqarnissaannik
Naalakkersuisut pilersaaruteqarpat?**

(Doris Jakobsen, Siumut)

Tunggavilersuut:

Napparsimasut aammalu piartortut Kangerlussuarmut aqqusaartartut ullumikkornit pitsaanerusumik atugaqalernissaat anguniarlugu Naalakkersuisut qanoq pilersaaruteqarnerat pillugu apeqquteqarpunga.

Kangerlussuaq sapaatit akunneri tamaasa inuppassuarnik aqqusaarneqartarpoq, erniartortunik, ajutoorsimasunik, napparsimasunik aammalu piartortunik.

Kræftimik nappaatillit, peruluttut aammalu ikiorneqaqqissinnaajunnaartut Rigshospitalimiik nunatsinnut angerlartinneqartarput ilaanni allaat ingiallorteqartinneqartaratik. Taakkua amerlanersaasa Kangerlussuaq aqqusaartarpaat, ilaannilu ingerlaqqinnissaminnut sivisuumik utaqqitinneqartarlutik. Taakkua napparsimasut, tiimerpassuit Kangerlussuup kantiinaani issiartarfiinilu utaqqisariaqartarput innangaarfissaqaratik nipaatumiluunniit qasuersaarfissaqaratik. Tamanna napparsimasunut piartortunullu pitsaasuunngilaq toqqissisimanaranilu. Assersuutigilara ungasitsorsuunngitsukkut kræftimik nappaateqartoq utoqqaq rullestolennarnik ingerlasoq 5 time sinnerlugu Kangerlussuarmeeqatigaara, soorunami qasoqaaq qasuersaarfissaqannginnamilu nerrivimmut pulluni siningusartartariaqarluni. Taama atugassaqartitsineq takullugu akueriuminaatsorujussuuvoq illersorneqarsinnaananilu.

Taamaammat isumaqarpunga piaarnerpaamik Naalakkersuisut iliuseqartariaqartut, napparsimasut Kangerlussuarmut aqqusaartut qasuersaartarfissaannik pilersitsinissamik.

Taamatut nassuiaateqarlunga Naalakkersuisunut apeqquteqaatigaara, Kangerlussuarmi ajornartorsiutaasoq pillugu Naalakkersuisut qanoq pilersaaruteqarnersut.

Apeqquteqaatimma ullut suliffiusut qulit iluanni akineqareersimanissaat kissaatigaara.